

SEKARIA

Iehova ena boiboi

¹ Darauese ena lohia laġanina iharuana lalonai, hua ihataurahanina ai, Iehova ena hereva na peroveta tauna Sekaria Berekia, Ido tubuna, dekenai e kau, eto, ² Iehova ese tamamui e badu henidia dikadika. ³ Taunabunai ba hamaorodia, baoto, Iehova Sabaota ini e gwau tomamu: Lau dekegu ai ba lou mai, Iehova Sabaota e tomu, bena lau ese umui baina lou henimui. Iehova Sabaota unu e gwau tomamu: ⁴ Tamamui heġereġeredia ai basiola. Peroveta gunadia ese idia e boi henidia, eto, Iehova Sabaota ini e gwau tomamu: Emui dala dikadia bona emui kara dikadia amo ba raka kerehai. Iehova na e tomu, To idia na asae kamonai, egu hereva asie abia dae. ⁵ Tamamui na edesenai ai? Bona peroveta taudia danu, idia na e mauri hanaihanaimu a? ⁶ A egu hereva bona egu taravatu, egu hesiai peroveta taudia na haġanilaidia gaudia, ese tamamui e lasidia tao ani? Una dainai idia na e helalo kerehai, eto, Iehova Sabaota ese e laloa hata eda dala bona eda kara heġereġeredia ai baine kara henida; bena unu vada e kara henida toma.

Peroveta tauna ena matu-hanai gini-gunana

⁷ Darauese ena lohia laġanina iharuana lalonai, hua ihagwauta-tana, ladana Sebata, dinana iharuhui-hanina ai, Iehova ena hereva na peroveta tauna Sekaria Berekia, Ido tubuna, enai e kau. Sekaria eto, ⁸ Hanuaboi ai tau ta na

itaia, hosi kakakakana ai e gui. Ia na koura ai e gini, keroro audia bogaragidiai; ia murinai na hosi haida, kakakakadia bona mai toutoudia bona kurokurodia. ⁹ Bena lau nato, Egu lohia e, ini na dahaka? Bena lau ida a hereva-hereva aneruna ese e hamaorogu, eto, Bainā haheita-laimu, unu na dahaka. ¹⁰ Taunabunai keroro audia bogaragidiai e giniva tauna na e haere, eto, Ini be Iehova ese tanobada i'itataona totona e siaidia ġaudia. ¹¹ Bena idia ese Iehova ena aneru, keroro audia bogaragidiai e giniva aneruna, e haere henia, eto, Tanobada vada a itaia tao; vada a itaia, tanobada idoinai e noho mainomu. ¹² Bena Iehova ena aneru eto, Iehova Sabaota e, Ierusalem bona Iuda hanuadia na laġani hituhui lalodiai vada o badu henidia; ma basio bogadia hisi ela bona edena nega ai? ¹³ Bena Iehova ese lau ida a hereva-hereva aneruna na hahenamo bona hahealo herevadia e gwaurai henia. ¹⁴ Taunabunai, lau ida a hereva-hereva aneruna ese e hamaorogu, eto, A boi lolo, baoto, Iehova Sabaota ini e gwau tomamu: Ierusalem bona Siona daidiae lalogu na e hekwarahi badamu. ¹⁵ Bena lau ese e noho namonamomu besedia na badu henidia dikadikamu; badina be sisina mo na badu negana ai, idia ese dika ma e habadaia. ¹⁶ Taunabunai Iehova na ini e gwau tomamu: Ierusalem vada name lou henia, mai hebogahisigu ida. Iehova Sabaota na e tomu, Egu dubu na ia lalonai bae haginia, bona hahetoho varona na Ierusalem daenai baine heveri roro. ¹⁷ Ma ba boi lolo, baoto, Iehova Sabaota ini e gwau tomamu: Egu hanua badadia na noho-namo ai ma bae honu honu dae, bona Iehova ese Siona

ma baine hahealo henia lou, bona Ierusalem ma baine abia hidi lou.

Peroveto tauna ena mata-hanai iharuana

¹⁸ Bena na gaga isi, doa hani na itadia. ¹⁹ Bena lau ida a hereva-hereva aneruna na nanadaia, nato, mi be dahaka? Bena ia ese e haere henigu, eto, Ini na Iuda bona Israel bona Ierusalem vada e hakaroho rohoroho doadua. ²⁰ Bena Iehova ese auri īgaukaralaina taudia hahani na e haheitalaigu. ²¹ Bena lau nato, Ini na dahaka ikarana totona vada e maimu? Ia ese e haere, eto, Unu na Iuda e hakarohoa rohoroho doadua, bena tau ta se gaga isi; a ini na ihagaridia totona vada ema, hari Iuda tanona īgīgi-rohorohna totona doadua e abidia isi besedia na ini hahaniosi ese bae tahodia dobi.

2

Peroveta launa ena mata-hanai ihatoina

¹ Bena na gaga isi, tau ta na itaia, mai ena hahetoho varona imana ai. ² Bena na nanadaia, nato, Ede bo laomu? Ia ese e haere henigu, eto, Ierusalem ihahetohona totona na laomu, baina itaia ena lababa na ede badana bona ena lata na ede badana. ³ Bena lau ida a hereva-hereva aneruna na itaia, ia na e raka lasi, bona aneru ma ta e raka kahi mai, ia ihedavari-henina totona, ⁴ e hamaoroa, eto, A heau, una eregabe tauna ba hamaoroa, baoto “Ierusalem bae noholaia, asi mağudia hanuadua e noholaidiamu na heto, badina be taunimanima bona boromakau bae momo ia lalonai. ⁵ Badina be lahi mağuna heğereğerenə ai bainala, heğeğemadai gabudia

iboudiai, bona hairai ai bainala ia lalonai. Iehova na e herevamu.”

Dauhai e hanohodia taudia iboiridia

⁶ Iehova na e tomu, He, he, mirigini kahana tanona ba heautania; badina be lau ese vada na hakarohomui rohoroho, guba laidia haniosi na heheto. Iehova na e herevamu. ⁷ He, Babulono natuna hahinena ida o nohomu taumu, a roho mauri, Siona a heau lao. ⁸ Badina be Iehova Sabaota ini e gwau toma, ia hairaina ese e dadimui besedia dekediai e siaigu murinai, badina be umui e daumui tohomu tauna ese ia matana nadinadina e davaa tohomu; ⁹ ia eto: A itaia, lau ese imagu baina davedavea idia daediae, bena edia hesiai taudia ese bae dadidia. Bena ba diba Iehova Sabaota ese vada e siaigu. ¹⁰ Siona natuna hahinena e, ane avabia, a moale; badina be, a itaia, lau na vasimu, umui bogaragimui ai baina noho. Iehova na e herevamu. ¹¹ Una dina ai bese momo na Iehova enai bae tao, egu bese ai baela; bena lau ese umui bogaragimui ai baina noho, bona umui na ba diba Iehova Sabaota ese vada e siaigu vasi. ¹² Bena Iehova ese Iuda baine abia, ia ahuna ai baine halaoa, tano helāgāna lalonai; bona Ierusalem ma baine abia hidi lou.

¹³ Taunimanima iboumui ai, asi reğereğemui ba noho, Iehova vairanai; badina be ia na vada e tore isi, ena noho gabuna helāgāna amo vada e raka lasi.

3

Peroveta tauna ena mata-hanai ihahanina

¹ Bena ia ese hahelağā tauna badana Iosua e haheitalaigu, Iehova ena aneru vairanai e gini,

bona Satana na ia idibana kahana ai e gini, ihabadelaina totona. ² Bena Iehova ese Satana e hereva henia, eto, Satana e, Iehova ese aine lodu henimu! Iehova, Ierusalem e abia hidi Diravana, ese aine lodu henimu! Ina na dia lahi amo e veria lasi tutuna a? ³ Hari Iosua na aneru vairanai e gini, mai hahedokina miroka-mirokadia ida. ⁴ Bena hari aneru ese ia vairanai ginidia taudia na e hamaorodia, eto, Hari hahedoki miroka-mirokadia na iena amo ba hadokidia oho. Bena ia ese Iosua e hereva henia, eto, A itaia, emu kara havara na emu amo vada na abia oho, dabua mai hairaidia na do baina hahedokilaimu. ⁵ Bena lau nato, Dabua ġoevaġgoevana na kwarana bae ġegelaia. Taunabunai idia ese dabua ġoevaġgoevana na kwarana e ġegelaia, bona hahedoki na e hahedokilaia; Iehova ena aneru na una gabu ai e gini.

⁶ Bena Iehova ena aneru ese Iosua e sisiba henia, eto, ⁷ Iehova Sabaota na ini e gwau tomamu: Egu dala ai boma raka bona egu hahedua boma badinaia, bena egu rumu do ba biagua bona egu maġu do ba reġudia; bona baina gwau maoro henimu, do ba raka vareai diba, iniseni ai ginidia taudia bogaragidiai. ⁸ Hahelaġa tauna badana Iosua e, harihari a kamonai, oi bona turamu hahidaosi vairamu ai helaidia, badina be idia na haridia nanamo taudia; a itaia, egu hesiae tauna, Rigi, baina mailaia. ⁹ Badina be, a itaia, Iosua vairanai vada na atoa nadina tamona kahana hituosi ai lau ese revarevana baina ġasie, bona dina tamona lalonai ina tano ena kerere baina abia oho. Iehova Sabaota na e herevamu. ¹⁰ Iehova Sabaota ma e tomu, Una dina ai umui iboumui ai ese ta ta dekena tauna dekena tauna

ba vavedia mai, emui vine audia bona emui suke audia henudiai.

4

Peroveta tauna ena mata-hanai iha-imana

¹ Bena lau ida a hereva-hereva aneruna ma ema, e haogu, mahuta tauna bema haoa na heto. ² Bena ia ese e nanadaigu, eto, Dahaka o itaiamu? Lau nato, Lamepa patana ta, *gold īgauna*, na itaiamu, dorina ai na dihu ta, bona ia latanai lamepa hitu, bona dorina lamepadia ta ta na mai ududia hitu. ³ Ia badibadinai na olive audia rua, ta dihu idibana kahana ai, ma ta laurina kahana ai. ⁴ Bena lau ida a hereva-hereva aneruna na nanadaia, nato, Ģauka e, ini na dahaka? ⁵ Bena lau ida a hereva-hereva aneruna ese e haere henigu, eto, Oi na asi dibamu ini na dahaka a? Lau nato, Ģauka e, lasi. ⁶ Bena ia ese e hamaorogu, eto, Ina na Iehova ena hereva Serubabele enai. Iehova Sabaota na ini e gwau tomamu: Dia goada amo eiava dia siahu amo, a Laumagu amo. ⁷ Ororo badana e, oi na dahaka? Serubabele vairanai oi na taora ai ba hahelao, bena ia ese atai nadina baine mailaia, bona taunimanima na bae lolo, baeto, Harihari-bada, harihari-bada ienai baine mia. ⁸ Iehova ena hereva ma ta danu egu ai e kau, eto, ⁹ Serubabele imana ese ina dubu badina vada e atoa, bona ia ese baine hağugurua danu. Bena vada ba diba, Iehova Sabaota ese vada e siaigu mai dekemu ai. ¹⁰ Badina be īgau maraġidia dinana vada e dadaraia tauna na baine moale, bona gini-maoro varona baine itaia Serubabele imana ai.

Ini hituosi na Iehova matana, tanobada idoinai e neneamu. ¹¹ Bena na nanadaia, nato, Ini olive audia ruaosi, lamepa patana idibana kahana ai bona laurina kahana ai be dahaka? ¹² Nega iharuana ma na nanadaia, nato, Hari olive audia rigidia ruaosi, *gold* baubaudia, dehoro e seilailia ġaudia, badibadidiae miamu be dahaka? ¹³ Ia ese e nanadaigu, eto, Oi asi dibamu ini na dahaka a? Lau nato, Ĝauka e, lasi. ¹⁴ Bena ia eto, Ini na e horodia taudia raruosi tanobada idoinai Lohiana badibadinai e ginimu taudia.

5

Peroveta tauna ena mata-hanai ihatauratoina

¹ Bena na gaga isi lou, na roha lao, buka helokuna ta na itaia, e rohova. ² Ia ese e nanadaigu, eto, Dahaka o itaiamu a? Lau na haere, nato, Buka helokuna ta rohona ai na itaiamu; ena lata na kiubit ruahui bona ena lababa na hubit gwauta. ³ Bena ia ese e hamaorogu, eto, Ina na heuduguirai ġauna, tano idoinai daenai e laomu; badina be ina murinai henao taudia iboudiae na bae henege daure, ia lalonai e hedinaraimu heġereġerena bona ia murinai e gwau hamata koikoimu taudia iboudiae na bae henege daure, ia lalonai e hedinaraimu heġereġerena. ⁴ Iehova Sabaota na e tomu: Lau ese baina siaia lao, henao tauna ena ruma lalonai baine vareai bona lau ladagu ai e gwau hamata koikoimu tauna ena ruma lalonai danu; bena ena ruma ai baine mia ela bona baine ha-olea, au bona nadi danu baine ha-oredia.

Peroveta tauna ena mata-hanai ihahituna

⁵ Bena lau ida a hereva-hereva aneruna e raka kahi mai, e hereva henigu, eto, A gaga isi, e lasimu ġauna na ba itaia. ⁶ Bena lau nato, Una na dahaka? Ia eto, Una na tohe ta e laomu. Ma eto, Ina na edia kara havara, tano idoinai lalonai. ⁷ Bena na itaia, auri-metauna ikaruhina na e heabi isi, bena tohe lalonai hahine ta e helaiva. ⁸ Bena ia eto, Ina na Kara Dika. Bena ma e doria dobi tohe lalonai, bona auri-metauna ikaruhina amo e karuhia ahu. ⁹ Bena na gaga dae, hahine rarua na itadia, e maiva. Lai ese hanidia e ha-evadia; hanidia na boġe hanidia na heheto. Bena idia ese hari tohe e abia isi, tanobada bona guba padadiai. ¹⁰ Bena lau ida a hereva-hereva aneruna na na nanadaia, nato, tlari tohe na ede e laohaiamu? ¹¹ Ia ese e hamaorogu, eto, Sinara tanona; unuseni ai dubuna bae haginia; baine gini vaitani bena tohe na ilahana latanai bae laia kau.

6

Peroveta tauna ena mata-hanai ihataurahainā

¹ Bena na gaga isi lou, kariota hani na itadia, ororo rua padadia amo e maiva. Hari ororo na auri-laboralabora ororodia. ² Kariota gini-gunana mai hosi kakakakadia; iharuana na mai hosi koremadia; ³ ihatoina na mai hosi kurokurodia; bona kariota ihahanina na mai hosi mia-koremadia mai toutoudia. ⁴ Bena lau ida a hereva-hereva aneruna na nanadaia, nato, Ĝauka e, ini be dahaka? ⁵ Hari aneru ese e haere henigu, eto, Ini na tanobada idoinai Lohiana vairanai bae hedinarai guna, bena guba laina haniosi ediai

baela. ⁶ Kariota mai hosi koremadia na mirigini kahana tanona be lao heniamu; kurokurodia na lahara kahana be lao heniamu; bona mai toutoudia ġaudia na diho kahana be lao heniamu. ⁷ Hari hosi na e heau lasi negana ai, idia na e ġava, baela, tanobada bae itaia tao eto. Bena ia eto, Aola, tanobada ba itaia tao. Taunabunai, idia na tanobada i'ita-taona ela. ⁸ Bena ia ese e boi henigu, eto, A itaia, mirigini kahana vada e lao heniamu taudia ese Laumagu vada e halagaia ani, una mirigini kahana tanona ai.

Iosua kwarana ihavavalaina

⁹ Iehova ena hereva na egu ai e kau, eto, ¹⁰ Dauhai e hanohodia taudia bogaragidia amo, Heledai bona Tobia bona Iedaia bavabidia; idia na Babulono amo vada ema. Bena una dina tamona ai Iosia Sefania ena ruma baola. ¹¹ Idia ediai *silver* bona *gold* bavabi, havava ġauna ta ba karaia, bena Iosua Iehosadak, hahelaġa tauna badana, kwarana ba havavalalaia. ¹² Bena ba hamaoroa, baoto, Iehova Sabaota na ini e gwau tomamu: Tau ladana Rigi a itaia; badina be ia na ena gabu ai baine tubu, bena ia ese Iehova ena dubu baine haginia. ¹³ Ia ese Iehova ena dubu baine haginia, bena bae matauraia, pavapava na heto; bena ena terono ai baine helai, baine lohia. Ena terono badibadinai hahelaġa tauna ta baine gini; bena raruosi lalodia bae tamona, mai mainodia ida. ¹⁴ Bena hari havava ġauna na Iehova ena dubu ai baine mia, Heledai, Tobia, Iedaia bona Iosia Sefania ihahelalo-unedia totona.

¹⁵ Dauhai e nohomu taudia na baema, Iehova ena dubu ihaginina ai bae heduru; bena vada ba diba, Iehova Sabaota ese vada e siaigu dekemu ai.

Bena Iehova, emui Dirava, gadona ba badinaia namonamo, ini ġau do bae vara.

7

Anivaga koikoidia

¹ King Darauese ena lohia laġanina ihahanina ai, huana ihataurahani-tana, ladana Kislev, dinana ihahanina lalonai, Iehova ena hereva na Sekaria enai e kau. ² Una negana ai Betele taudia ese Saresere bona Regeme-melek, mai edia orea taudia ida, e siaidia lao, Iehova bae noia, ena hahenamo na latadiai baine kau. ³ Bona Iehova Sabaota ena dubu ai hahelaġa taudia bona peroveta taudia na bae nanadaidia baeto, Hua iha-imana ai baina taitai bona baina anivaga, laġani gunadia momo lalodai vada na karaia heġereġerena eiava? ⁴ Bena Iehova Sabaota ena hereva na egu ai e kau, eto, ⁵ Tano taudia iboudiai bona hahelaġa taudia danu ba hamaorodia, baoto: Ene laġani hitu-ahuiosi lalodai, hua iha-imana ai bona hua ihahituna ai o taitaiva bona o anivagava negadia ai na lau daigu ai o anivagava a? ⁶ Bona o anianimu o inuinumu negadia ai, umui sibomui daimui ai o anianimu bona o inuinumu, ani? ⁷ Ierusalem bona ena het-abira hanuadia na e noholaidiava mai namodia ida, bona diho kahana bona taora kahadia danue noholaidiava, negana ai ini hereva na Iehova ese peroveta taudia gunadia ududia amo e gwaurai, ani?

Gwau-edede davana

⁸ Iehova ena hereva na Sekaria enai e kau, eto,
⁹ Iehova Sabaota na ini e gwau tomamu: Ba hahe-maoro ġoevaġgoevä; ta ta tadikakana tadikakana bae kara namo henidia bona bae bogadia hisi.
¹⁰ Vabu, ihareha, noho-hedoa tauna, ogoġami tauna basio hahisidia; bona ta ese tadikakana ihadikana dalana ta basine lalo hatalaia. ¹¹ A idia na asie ura bae kamonai; bena e helai muri henia bona taiadia e kodobedia, basie kamonai helaoreana. ¹² Lalodia na e ha-aukadia masemase, Iehova Sabaota ena Lauma ese peroveta taudia gunadia edia amo e siaidia taravatudia bona herevadia bae kamonai na garina. Taunabunai badu ġaraġara bada-hereea na Iehova Sabaota ena amo e kau. ¹³ Iehova Sabaota na e tomu, Lau na boiboi bena idia asie kamonai heġereġerena ai idia e boiboi bena lau asina kamonai; ¹⁴ bena koe-hirihiri amo na hakarohodia rohoroho, asi diba-dia besedia iboudiai bogaragidiae. Taunabunai, e rakatania tanona na vada e vahu, asi lao mai tauna ta; tano namona vada e havahua vaitani.

8

Ierusalem baine gini lou

¹ Bena Iehova Sabaota ena hereva na egu ai e kau, eto, ² Iehova Sabaota na ini e gwau tomamu: Siona dainai lalogu na e hekwarahimu, mai lalo-hekwarahigu badana ida bona mai badugaragaragu ida. ³ Iehova ini e gwau tomamu: Siona baina lou henia, Ierusalem bogaraginai baina noho; bena Ierusalem na bae gwauraia “Heabidadama Hanuana”, bona Iehova Sabaota ena ororo na bae gwauraia “Ororo Helaġana”.

⁴ Iehova Sabaota ini e gwau tomamu: Tatau burukadia bona hahine burukadia na Ierusalem hanuana ariaradia ai ma bae helai, ta ta mai edia itotohi, vada e buruka herea dainai. ⁵ Bona una hanua ariaradia na memero bona kekeni ese bae hahonudia, ariara lalodai bae gadara. ⁶ Iehova Sabaota ini e gwau tomamu: Reana ina nega ai ina bese kwabukwabuna ese una kara na bema hoalaia dainai umui na o tomamu lau ese danu baina hoalaia a! Iehova Sabaota na e herevamu. ⁷ Iehova Sabaota ma ini e gwau tomamu: A itaia, egu bese taudia baina hamauridia, laurabada kahana tanodia amo bona lahara kahana tanodia amo; ⁸ bema baina hakaudia mai, Ierusalem bogaraginai baina hanohodia. Idia na lauegu bese ai baela, bona lau na edia Dirava ai bainala, heabidadama ai bona kara maoromaoro ai.

⁹ Iehova Sabaota ini e gwau tomamu: Umui, ina negana ai ini hereva o hakala henimu, dubu helāgāna baine gini totona Iehova Sabaota ena dubu badina e atoa dinana amo peroveta taudia ududia amo e lasi herevadia o kamonaimu tau-mui e, imamui ba ha-aukadia. ¹⁰ Badina be unu dina do asie kau ai, taunimanima ena ġaukara na asi davana bona boromakau maruanena ena ġaukara na asi davana, bona e raka lasi eiava e raka vareai tauna na asi ena dala ana inai tauna imana amo baine roho mauri; badina be lau ese taunimanima iboudiai na bamodia ida na haheinaidia heheni. ¹¹ A harihari lau ese ina bese kwabukwabuna basina kara henidia nega gunadia heğereğeredia. Iehova Sabaota na e herevamu. ¹² Badina be maino baine hehado; vine na baine huahua, bona tano anina baine vara, bona guba hununa baine diho; bona ini

ḡau iboudiai na ina bese kwabukwabuna baina henidia, bae ḡaunaidia. ¹³ Iuda taumui bona Israel taumui e, umui na bese idau-idau bogaragidiai heuduguirai gwaurai-gwaurai herevana ai vada ola heğereğerenai ai, lau ese do baina hamaurimui, bena hahenamo taumui ai baola. Basio gari, a imamui ba ha-aukadia.

¹⁴ Badina be Iehova Sabaota ini e gwau tomamu: Senemui ese e habadugu negana ai, lau na laloa hata baina kara dika henimui nato, bena asina helalo kerehai (Iehova Sabaota na e tomu), ¹⁵ unuhetomana ini dinadia ai ma vada na laloa hata, Ierusalem bona Iuda iduhuna baina kara namo henidia. Basio gari. ¹⁶ Ba kara ḡaudia bini: Ba hereva heheni mai momokanimui ida; emui hanua ikoukoudia ai hahemaoro karadia ba kara mai momokanimui bona mai mainomui ida; ¹⁷ ba hahedika heheni daladia na lalomui ai basio lalo hata, bona gwauhamata koikoidia basio uralai; badina be unu ḡau iboudiai na na inai henidiamu. Iehova na e herevamu.

¹⁸ Bena Iehova Sabaota ena hereva na egu ai e kau, eto, ¹⁹ Iehova Sabaota ini e gwau tomamu: Hua ihahanina bona iha-imana bona ihahituna bona ihagwautana anivagadia na moale bona hisi-dae negadia ai baela, Iuda taudia bogaragidiai, bona hahemoale ariadia negadia ai baela danu; taunabunai hereva momokani bona maino ba ura henidia.

²⁰ Iehova Sabaota ini e gwau tomamu: Bese idau-idau taudia do baema, hanua momo inoholaidia taudia; ²¹ bena hanua ta taudia ese ma hanua ta taudia dekedia baela, baeto “Ina harihari aitala, Iehova baita noia ia ese baine

hahenamo henida, bona Iehova Sabaota baita tahua; lau be vada na laomu". ²² Bese momo bona basileia mai goadadia na baema, Ierusalem ai Iehova Sabaota bae tahua bona Iehova bae noia ia ese baine hahenamo henidia. ²³ Iehova Sabaota ini e gwau tomamu: Unu dinadia ai tatau gwauta, gado idau-idau iboudiai besedia amo, ese Iuda tauna ta ena dabua bae dogoa tao, baeto, Mani oi ida aitala, badina be ai na vada a kamonai, Dirava na dekedekemu ai.

9

Maduna metauna bese haida latadiai

- ¹ Maduna metauna herevana ta:
Iehova ena hereva na Hadraka tanona latanai,
bona Damasko latanai baine kau.
Badina be Aram hanuadia na Iehova ena,
Israel iduhudia iboudiai heğereğeredia;
- ² Hamat danu, ia hetabiranai,
Turo bona Sidono, ena be edia aonega na
herea,
to idia danu Iehova ena.
- ³ Turo ese ena mağu aukana ta vada e haginia,
silver vada e hasenua, ġaħu na heto,
bona *gold* danu, ariara momorudia na
heheto.
- ⁴ To, a itaia, ġauba da ese ena ġau iboudiai baine
abidia oho,
bona ena taġa na davara ai baine negea;
bena lahi ese hanua na baine araia ore.
- ⁵ Askelono ese baine itaia, bena baine gari;
Gasa danu, bena hisihisi ai baine hehure-
hehure;
Ekron danu, badina be ena helaro vada e baia;

- Pavapava na Gasa amo baine boio,
 Askelono na baine mia, asi inoholaina;
⁶ vara-hanai taudia na Asdod ai bae noho;
 Filistia ena heāgi baina hadokoa.
- ⁷ Ana rara na uduна amo baina abia oho,
 bona ana āgu dika-rohorohodia na isedia
 padadia amo danu.
- Ia danu orea kwabukwabuna ta ai bainela, eda
 Dirava ena;
 ia na Iuda iduhuna ta hegeregērena ai
 bainela,
 bona Ekron na Iebusu taudia hegeregēredia
 ai bainela.
- ⁸ Bena egū rumā ai baina kone noho, baina
 gimaia,
 ta na basine raka lao raka mai helaooreana;
 hahehisī tauna ta ese basine hahebolodia uru lou,
 badina be harihari lau sibogu matagu amo na
 heitamu.

Siona pavapavanaugh

- ⁹ Siona kekenimu e, a moale hisi dae!
 Ierusalem kekenimu e, a lolo badabada!
- A itaia, emu pavapava na e vasimu,
 mai siahuna bona mai kwalimuna ida;
 ia na manau; ia na doniki ai e guimu,
 doniki nat una latanai e gui kaum.
- ¹⁰ Kariota na Efraim amo baina negea daure,
 bona tuari hosina danu Ierusalem amo;
 tuari pevana danu baine henege daure.
- Ia ese bese idau-idau baine haherohedia
 maino;
- ena basileia na baine hesiriu, kone ta amo ela
 bona ma kone ta,

bona Sinavai Badana amo ela bona tanobada dokodia.

Siona ihamaurina

- 11 Oi danu, eda herohemaino rarana dainai,
emu īgui taudia na guri haura-haurana amo
baina ruhadia nege.
- 12 Dauhai nohomui ai o helaro hanaihanaimu
taumui e,
emui gabu aukana ba lou henia;
hari dina ai na gwauraiamu, harua ma baina
henimui lou.
- 13 Badina be Iuda vada na marea, egu peva;
Efraim na ia hakorena ai vada na halaoa.
Siona e, oi natumu baina rubedia;
Helene tanona e, oi natumu daedai baina
rubedia;
tuari tauna ena dare hegeregērena ai baina
dapadapalaimu.
- 14 Bena Iehova na idia daedai baine hedinarai,
ena hakore bainela kevaru na heto;
Gaubađa Iehova ese kibi baine hiriria,
diho kahana koe-hirihiřidia ai baine raka lao.
- 15 Iehova Sabaota ese baine gimadia,
vilipopo taudia bae ha-oredia bona bae
moimoilaidia;
bena raradia bae inu, vine lanuna na heto;
bae honu, kehere na helo;
bae parika-parika, ihaboulaina patana dai-
gunidia na heheto.
- 16 Una dina ai Iehova, edia Dirava, ese baine
hamauridia,
badina be idia na ena bese verina;

badina be kwara ivavalaina ġauna iheralaina
 nadidia na heheto,
 idia na ena tano daenai bae kiama-kiama.
¹⁷ Momokani, Daka namo! Daka hairai!
 Uit ese uhau baine hagoaadadia,
 bona vine ranuna matamatana ese ulato
 baine hagoaadadia.

10

Iehova ena hahemauri

- ¹ Medu na Iehova enai ba noia,
 medu gabena negana ai;
 Iehova, dagadaga e karadiamu
 bona batugu na taunimanima e henidiamu
 bona uma anidia na taunimanima iboudiai e
 henidiamu
 Diravana na ba noia.
² Badina be e koro laulaudia helaġadie na e
 hereva kava hereva kavamu,
 bona mari-abi taudia ese ġau koikoidia e
 itadiamu;
 nihi taudia ese nihi koikoidia e herevalaidiamu,
 bona tauhalo herevadia asi anidia e gwau-
 raidiamu.
 Una dainai taunimanima na e loa eva-evamu,
 mamoe na heheto,
 idia na hisi e animu, asi ireġudia tauna
 dainai.
³ Egu badu na e ġaraġaramu, mamoe ireġudia
 taudia latadiai;
 hegunalai taudia na matadia baina hakani.
 Badina be Iehova Sabaota ese ena seri, Iuda
 iduhuna, e reġuam;
- tuari ai ia ese ena heägi hosina heğereğerena
 ai baine halaodia.

- ⁴ Idia bogaragidia amo daiguni nadina bainema;
 idia bogaragidia amo kalaga ikokona
 bainema;
 idia bogaragidia amo tuari pevana bainema;
 idia bogaragidia amo lohia iboudiai baema.
- ⁵ Heboudia ai idia na tuari taudia mai goadadia
 heğereğeredia ai baela,
 inai taudia na ariara kopukopudia ai bae
 moimoilaidia;
 idia na bae tuari, badina be Iehova na idia
 dekedekediai,
 idia ese hosi ai e guimu taudia bae hadarere-
 dia.
- ⁶ Iuda iduhuna baina hagoadaia,
 bona Iosef iduhuna baina hamauria.
 Bainaloulaidia, badina be na bogadia hisimu,
 bena basinama dadaraidia heğereğerenai
 baela;
 badina be lau na Iehova, edia Dirava,
 bona lau ese baina haere henidia.
- ⁷ Bena Efraim na tuari tauna mai goadana
 heğereğerenai ai bainela,
 bona lalodia na bae moale, vine ranuna
 bema inua na heto.
- Natudia ese bae itaia, bena bae moale,
 lalodia ese Iehova bae heağilaia.
- ⁸ Bainakalodia, baina haboudia,
 badina be lau ese vada na hamauridia;
 bena bae hutuma, gunaguna heğereğerenai.
- ⁹ Ena be na hakarohodia rohoroho, bese idau-
 idau bogaragidiai,
 to tano daudaudia ai bae lalogu tao;

bena idia bona natudia bae mauri,
bona bae lou mai.

¹⁰ Aigupto tanona amo baina hakaudia mai,
bona Asuria amo baina haboudia,
bena Gilead tanona ai bona Lebanon ai baina
hakaudia vareai,
ela bona asi nohonoho gabudia.

¹¹ Aigupto davarana bae hanaia,
davara hurehuredia bae vea,
bona Nilo sinavaina ena dobu gabudia
iboudiai na bae kororo.

Asuria ena hekokoroku bae hahemaraia,
bona Aigupto ena dagi auna baine lasihi.

¹² Iehova ena goada ai baina hagoedadia,
bena ia ladana bae imodaia.
Iehova na e herevamu.

11

¹ Lebanon e, iduaramu a kehodia,
bena lahi ese emu sida audia baine aradia
ore!

² Beroso auna e, a tai! Badina be sida auna vada
e gari;
badina be au herea-daedia vada e dika vaitani.

Basan *oak* audia e, a tai!
Badina be uda audia hedoma-hedomadia
vada e hagaridia.

³ A hakala, mamoe iregudia taudia na e taimu!
Badina be hairaidia vada e dika vaitani.
A hakala, leona na e goumu!
Badina be Ioridane udana vada e hakorua.

Mamoe iregudia taudia asi namodia

⁴ Iehova, egu Dirava, ini e gwau toma: Ialadia
vada e gwaurai hata mamoedia iboudiai iregudia

tauna ai baola. ⁵ E hoidia taudia ese e aladia masemu, bona ta ese matadia se hakanidiamu; e hoihoilaidiamu taudia na e tomu “Iehova aita hanamo, lau vada na tagā”; bona iregūdīa taudia korikoridīa ese asie bogadīa hisimū. ⁶ Iehova na e tomu: Badina be ina tano inoholaina taudia basina bogadīa hisi lou. A itaia, lau ese taunimanima na ta ta ireguna tauna ireguna tauna imadīa ai, bona ta ta ena pavapava ena pavapava imadīa ai, baina atodia kau; bena idīa ese tanobada bae hadarerea, bona lau ese tau ta na idīa imadīa amo basina harohodīa maurī.

⁷ Taunabunai, lau na mamoe ihoihoilaidīa taudīa daidīai ialadīa vada e gwaurai hata mamoe-dīa iregūdīa tauna ai nala. Bena itotohi rua na abidīa: ta ladana na hatoa Harihari-bada, ma ta ladana na hatoa Hahetamona. Bena mamoe na regūdīa. ⁸ Hua tamona lalonai lau ese mamoe iregūdīa taudīa tatoiosi na aladīa mase. A egū haheauka e ore, mamoe edīai, bona idīa ese e inai henigu. ⁹ Taunabunai lau nato, Lau ese basina regumui. Dahaka baine mase, vada baine mase; bona dahaka bae habuaia tari, vada bae habuaia tari; bena kwabukwabudīa ese bae heani hehenī. ¹⁰ Bena egū itotohi ladana Harihari-bada na abia, na hakwaidua; unu amo egū gwauhamata, bese iboudīai na gwau hamalalai henidīa īauna, na na utua. ¹¹ Taunabunai, una dīna ai e heutu, bona mamoe e hoihoilaidīa taudīa ese e itagu tao, bena lalodīa vada e parara una na Iehova ena hereva. ¹² Bena na hamaorodīa, nato, Bema lalomui baeto maoro, egū īaukāra davana boma henigu, a bema lasi, boma rua. Bena idīa ese egū īaukāra davana e hahetoho, *silver* sekeledīa toi-

ahui. ¹³ Bena Iehova ese e hamaorogu, eto, Moni mauana ai ba udaia dobi. (Una na dava hereadaena idia ese egu ġaukara e davalalaia ġauna). Taunabunai, lau ese hari *silver* sekeledia toi-ahui na abidia, moni mauana ai na uda dobi, Iehova ena dubu ai. ¹⁴ Bena egu itotohi iharuana, ladana Hahetamona, na hakwaidua, unu amo Iuda bona Israel edia hetadikaka na utua.

¹⁵ Bena Iehova ese e hamaorogu, eto, Mamoe ireġudia tauna asi namona ena ġaukara ġaudia ma bavabidia lou. ¹⁶ Badina be, a itaia, lau ese mamoe ireġudia tauna ta ina tano ai na hagini-amu; ia ese be masemu taudia na se naridiamu, eiava raka-boioboio taudia na se tahudiamu, eiava mai berodia taudia na se hamauridiamu, eiava goada taudia na se ubudiamu, a ubu-ubu ġaudia hidiodia e animu, aedia kahaudia danu e raġadia ohomu.

¹⁷ Egu mamoe ireġudia tauna asi namona, madi ihabaina!

Ia ese ena mamoe serina e rakataniamu.
Dare ese ia imana baine dapaia,

bona matana idibana danu baine taraia,
una na baine namo.

Imana do baine heveri,
bona matana idibana baine kepulu vaitani,
una na baine namo.

12

Jerusalem ihamaurina

¹ Maduna metauna herevana Iehova ena amo, Israel dainai. Iehova, guba vada e idia roro bona tanobada vada e karaia bona taunimanima laumana na ia lalonai vada e havaraia Diravana,

na ini e gwau tomamu: ² A itaia, lau ese Ierusalem na hahekeroko keherena ai baina halaoa, hegegemadai besedia iboudiai ediai; Iuda ihadikana ġauna ai bainela danu, Ierusalem bae koua heġeġe negana ai. ³ Una dina ai lau ese Ierusalem na nadi metauna ta ai baina halaoa, bese iboudiai edia; bae abia isi taudia iboudiai na sibodia bae hahehisu herea. Bena tanobada basileiadia iboudiai na bae hahebou, ia ihadikana. ⁴ Iehova na e tomu: Una dina ai, hosi iboudiai kudoudia baina hahetahadia, bona hosi-gui taudia iboudiai na baina hakavakavadia. A Iuda iduhuna taudia na matagu baina hapapa henidia, bese idau-idaudia taudia edia hosi iboudiai matadia baina hakepuludia negana ai. ⁵ Bena Iuda iduhudia taudia na bae hereva heheni, baeto “Ierusalem inoholaina taudia ese goada e abiamu, Iehova Sabaota, edia Dirava, dainai”.

⁶ Una dina ai, Iuda iduhudia na gida keberena au bogaragidiae na heto, eiava kede hururu-hururuna rei kakoro bogaraginai na heto; heġeġemadai besedia iboudiai, idiba kahana ai bona lauri kahana ai, na idia ese bae aradia ore, a Ierusalem na gabuna ai baine mia, mai inoholaina taudia ida.

⁷ Iehova ese kwalimu na Iuda kalagadia baine henidia guna, David iduhuna hairaina bona Ierusalem inoholaina taudia hairaidia ese Iuda hairaina basie hereaia helaoreana. ⁸ Una dina ai Iehova ese Ierusalem inoholaina taudia na kesi amo baine koudia heġeġe; una dainai manokamanoka-herea tauna idia bogaragidiae na una dina ai David ida bae heġereġere; bona David iduhuna na Dirava ida, Iehova ena aneru

ida, bae heğereğere, idia ikwaradia ai. ⁹ Una dina ai danu lau ese Ierusalem e tuari heniamu basileiadia iboudiai ihabua-taridia dalana baina tahua.

¹⁰ Bena David iduhuna bona Ierusalem inoholaina taudia latadiai hebogahisi bona noinoi laumana baina seja dobi; taunabunai vada e gwadaia uru tauna bae raraia negana ai, idia na ia taina bae tai, ta ese natuna vara edeana bema tailaia na heto, bona bae tai ġodeğadelia, ta ese natuna roboana bema taitailaia na heto. ¹¹ Una dina ai taitai na baine bada herea Ierusalem ai, Megido taorana ai, Hadadarimon taina e taiva na heto. ¹² Tano taudia na bae taitai, edia iduhu ta ta ai: David iduhuna tataudia na sibodia bona adavadia danu sibodia; Natan iduhuna tataudia na sibodia bona adavadia danu sibodia; ¹³ Levi iduhuna tataudia na sibodia bona adavadia danu sibodia; Simei iduhuna tataudia na sibodia bona adavadia danu sibodia; ¹⁴ bona iduhu oredia iboudiai tataudia na sibodia bona adavadia danu sibodia.

13

¹ Una dina ai ranu baine hahelohilohi dae David iduhuna bona Ierusalem inoholaina taudia edia, kara dikadia bona mirodia amo bae ha-hegoeva totona.

² Iehova Sabaota na e tomu, Una dina ai danu kaivakuku ladadia na tano amo baina negedia daure; bera tau ta ese basine lalodia tao lou; bona peroveta taudia bona lauma mai mirona danu na tano amo baina abidia oho. ³ Bema ta ma baine hedinarai, baineto ia na peroveta tauna, bera ia e havaraia tauna bona hahinena ese bae hamaoroa, baeto “Emu mauri na basine

mia badina be hereva koikoidia na Iehova ladana ai o gwauraimu”; bena baine peroveta negana ai, e havaraia tauna bona hahinena ese bae gwadaia uru. ⁴ Una dina ai peroveta taudia iboudiai na edia mata-hanai daidai bae hemarai, bae peroveta negadia ai; idia na hahedoki huika-huikadia basie hahedokilai, taunimanima ikoidia totona. ⁵ A idia baeto, Ai na dia peroveta taudia, ai na biru taudia; badina be ina tano na emai tano korikori, tauhaumai negana amo. ⁶ Bena ta ese bema nanadaidia, bema toma “Ene dorumui berodia be dahaka?”, idia baeto “Ini bero na turamai edia rumai ai a davari”.

Iehova ena mamoe iregudia tauna irahu-masena

⁷ Iehova Sabaota na e tomu: Dare e, a nog!

Egu mamoe iregudia tauna ihadikana totona, badibadigu ai e ginimu tauna ihadikana totona.

Mamoe iregudia tauna ba rahua mase,
benamamoe na bae karoho rohoroho,
lau imagu baina toia roro,
maragidia ihadikadia totona.

⁸ Iehova na e tomu: Tano idoinai lalonai
tatoi lalodia amo rarua bae negedia daure
bae mase,
bonatamona mo baine mauri.

⁹ Bena unu ihatatoidia na lahi ai baina atodia,
baina hāgoevadia, *silver* e hagoevaiamu na heto,
baina tohodia, *gold* e tohoamu na heto.

Idia ese lau ladagu bae hahanea,
benalau ese baina haere henidia.
Bainato “Idia na lauegu bese”,

bona idia baeto “Iehova na egu Dirava”.

14

Iehova ena dina

¹ A itaia, Iehova ena dina na e maimu; una dina ai emui amo e dadi oho kohudia na bogaragimui ai ma bae heharilai. ² Badina be basileia iboudiai baina haboudia, Ierusalem bae tuari henia totona; bona hanua na bae abia, rumu kohudia na bae dadi, bona hahine na bae hadikadia; a taunimanima oredia na hanua amo basie henege daure. ³ Bena Iehova baine raka lasi,unu basileia na baine tuari henidia, tuari dinana ai e tuarimu na heto. ⁴ Una dina ai, ia aena na Olive ororona, Ierusalem vairanai, mairiveina kahana ai e miamu ġauna, latanai bae hahedai; bona Olive ororona baine hepola parara, laurabada kahana amo ela bona lahara kahana; koura mai lababana ta baine hekara. Taunabunai Ororo kahana ta na mirigini kahana bainela, bona kahana ta na diho kahana bainela. ⁵ Egu ororo kourana na baine hekou ahu; badina be ororo kourana ese ia ohena ai baine hetomu kau. Bena umui na ba heau oho, Usia, Iuda pavapavana, ena nega ai tano laġa o heautania na heto. Bena Iehova, emui Dirava, bainema bona helāġa taudia iboudiai danu ia ida.

⁶ Una dina ai keru eiava paraka mavamavana basie vara. ⁷ Bena diari na baine hesiriu hanai-hanai (Iehova na mai dibana), dia dina bona dia hanuaboi; ena be dina baine diho to diari na baine mia.

⁸ Una dina ai, mauri ranudia na Ierusalem lalona amo bae aru lasi, kahana na laurabada kahana davarana ai bae aru lasi, ma kahana na

lahara kahana davarana ai; bae aru hanaihanai, siahu negana ai bona keru negana ai danu.

⁹ Bena Iehova ese tanobada idoinai baine pava-pavaia; una dina ai Iehova na baine tamona bona ia ladana danu baine tamona.

¹⁰ Tano idoinai na taora ai baine hahelao, Geba amo ela bona Rimon, Ierusalem diho-kahaha ai. A Ierusalem na atai ai baine mia, gabana korikorina ai, Beniamina Ikoukouna amo ela ikoukou gunana, ela bona Daiguni Ikoukouna, bona Hananele Kohorona ela bona pavapava ena vine itaolaidia gabudia. ¹¹ Bona haida ese bae noholaia, badina be hevadari basine mia; Ierusalem taudia na bae noho namonamo, asi garidia.

¹² Bena Ierusalem bae tuari henia besedia iboudiai na Iehova ese ina dai-hanai gorerena amo baine hahisidia: ginidia ai hidiodia bae pata, bona kwaradia ai matadia bae pata, bona ududia ai maladia bae pata. ¹³ Una dina ai gari badehereana Iehova ena amo na idia latadiai baine kau, bera ta ta ese bamona bamona imadia bae abi, bona ta ta ese imadia bae abi isi, bamodia ihadikadia totona; ¹⁴ Iuda ese danu Ierusalem baine tuari henia. Bena hegegemadai besedia iboudiai edia tağā na bae haboudia, *gold* bona *silver* bona dabua momo herea. ¹⁵ Bena dai-hanai gorerena ta, hari gorere hegeregere na hosi bona doniki badadia bona kamelo bona doniki marağidia, bona ubu-ubu ġaudiā dahaka dahaka unu taruha lalodiai bae mia, latadiai baine kau.

¹⁶ Bena roho-mauri taudia iboudiai,unu Ierusalem vada e tuari henia besedia idau-idauboudiai amo, na lağāni ta ta ai Ierusalem bae

dara dae, Ģaubada, Iehova Sabaota, itomadiho-henina bona kalaga ariana ibadinana totona. ¹⁷ A tanobada iduhudia haida na Ģaubada, Iehova Sabaota, itomadiho-henina totona Ierusalem basiema dara dae, medu na idia latadiai basie diho. ¹⁸ Bona Aigupto taudia danu basiema dara dae, unuseni ai basiema hedinarai, bena Iehova ese kalaga ariana ibadinana totona asie dara daemu besedia e hahisilaidiamu gorerena na idia danu latadiai baine kau. ¹⁹ Aigupto davana bona kalaga ariana ibadinana totona asie dara daemu besedia iboudiai davadia na unu bae abitoma.

²⁰ Una dina ai hosi aiodia gabagabadia ai ina revareva bae tore: “Helaġa, Iehova ena”. Bona Iehova ena dubu ai bae mia urodia na ihaboulaina patana vairanai e miamu naudia heġeregeredja ai baela. ²¹ Uro iboudiai Ierusalem ai bona Iuda ai na bae helaġa, Iehova Sabaota enai; taunabunai edia boubou ġaudiä bae ha-helaġadiä taudia iboudiai na baema diba, bae abidia, edia boubou ġaudiä hidiodia na idia lalod diai bae nadudia. Bona hoihoi tauna ta na Iehova Sabaota ena dubu ai basine noho lou una dina ai.

**Buk Baibel long tokples Motu
The Holy Bible in the Motu language of Papua New
Guinea
Buk Baibel long tokples Motu long Nuigini**

Copyright © 1959-1973 Bible Society of Papua New Guinea

Language: Motu

Translation by: Bible Society of Papua New Guinea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-12-09

PDF generated using Haiola and XeLaTeX on 11 Nov 2022 from source files dated 9 Oct 2020

f540ed61-0b88-5365-8502-08ea44547ef2